

**Akileraruserinermik ingerlatsineq pillugu Inatsisartut inatsisaata  
allanngortinneqarnissaa pillugu Inatsisartut inatsisaat nr. 38, 28. november 2019-  
imeersaq**

(Uppernarsaatinik piffissami killilimmi paarinnittussaataanerup sivitsorneqarnera kiisalu illuutininik aalaakkaasunik attartortitsinernik kiisalu najukkani kalaalimineerniarfinni tuniniaanernik sullissinerit pillugit paasissutissanik nalunaarutiginnittarneq)

**§ 1**

Akileraruserinermik ingerlatsineq pillugu Inatsisartut inatsisaat nr. 11, 2. november 2006-imeersumi, kingullermik Inatsisartut inatsisaanni nr. 11, 1. juni 2017-imeersumi allanngortinneqartumi, makkua allanngortinneqarput:

1. § 18, *imm.* 4-p kingorna ilanngunneqassaaq:

“ *Imm.* 5. Akileraruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi § 35 a naapertorlugu malittarisassat atuutsinneqartut malillugit paasissutissanut nalunaarutigineqartussanut tunngavigineqartoq, tassungalu ilanngullugu paasissutissat nalunaarutigineqartussaataitanersut paasiniarneqarnissaanni atorneqartussatut paasissutissat § 35 a naapertorlugu malittarisassat atuutsinneqartut malillugit nalunaaruteqartussaataitanermut piffissaritinneqartup naaneraniit ukiuni tallimani paarineqartassapput.”

2. § 33 d kingorna ilanngunneqassaaq:

” § 33 e. Digitalimik kiffartuussisarfikkoortumik illuutininik aalaakkaasunik attartortitsinernik kiisalu taakkununga akiliinernut sullissisoq, akilerarutissat annertussusilernissaannut atugassanik ukiut tamaasa kaammattorneqarani akilerartarnermut ingerlatsivimmut sullissinerup imarisai pillugit paasissutissiissaaq, ilanngullugit attartornermut akiliutinik tigusisoq, immikkoortoq attartortinneqartoq, ullut unnuallu attartortitsiviusut, akiliutit ingerlateqqinneqartut annertussusaat, kontunormu attartornermut akiliiffiusoq pillugit paasissutissat, kiisalu attartortitsisoq pillugu paasissutissat, ilanngullugit aqqa, najugaa, cpr nr. assigisaaluunniit attartortitsisup qularnaatsumik kinaassusersinissaanut naleqquttoq. Paasissutissiisussaataaneq akunnittarfinnut, unnuisitsisarfinnut assigisaannullu inuussutissarsiuutigalugu ingerlatanut, inimik imaluunniit inissiamik attartortitsinernik taamaallaat sullissivigineqartunut, atuutinngilaq.

*Imm.* 2. *Imm.* 1 malillugu paasissutissiisussaataaneq aamma illuutininik aalaakkaasunik attartortitsinernik sullissinernut, digitalimik kiffartuussisarfikkoortumik ingerlanneqartunut, kiffartuussinermut akiliuteqarneq kiffartuussisarfikkoortumik ingerlanneqarsimappat, atuuppoq.

*Imm.* 3. Naalakkersuisut *imm.* 1 aamma 2 malillugit paasissutissanik tunniussisarneq pillugu maleruagassanik erseqqinnerusunik aalajangersaasinnaapput.

§ 33 f. Akilerneqarluni tunisassianik aalisarnermeersunik, piniarnermeersunik, aallaaniarnermeersunik, savaateqarnermeersunik, eqqumiitsuliornermeersunik imaluunniit kusanartulianeersunik tuniniaanernik sullissisoq, tuniniaaneq inuussutissarsiortumut B-tut isertitaqaataappat, akileraarutissat annertussusilernissaannut atugassanik ukiut tamaasa kaammattorneqarani akileraartarnermut ingerlatsivimmut aqqa, najugaa aamma cpr nr. paasissutissiissutigalugit sullissinerup imarisai pillugit paasissutissiissaaq, ilanngullugit tunisassianut akiliutinik tiguisusaaq, kiisalu akiliutit ingerlateqqinneqartut annertussusaat pillugit paasissutissat.

*Imm. 2. Naalakkersuisut imm. 1 malillugu paasissutissanik tunniussisarneq pillugu maleruagassanik erseqqinnerusunik aalajangersaasinnaapput.”*

## § 2

Inatsisartut inatsisaat ulloq 1. januar 2020 atuutilissaaq.

*Namminersorlutik Oqartussat, ulloq 28. november 2019*



Kim Kielsen